

Službene novine Federacije BiH, broj 11/09

Na osnovu člana 5. stav 2. Zakona o cestovnom prijevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

PRAVILNIK

O IZMJENAMA I DOPUNAMA PRAVILNIKA O TEHNIČKO - EKSPLOATACIONIM USLOVIMA ZA VOZILA KOJIMA SE OBAVLJAJU POJEDINE VRSTE PRIJEVOZA

Član 1.

U Pravilniku o tehničko - eksploatacionim uslovima za vozila kojima se obavljaju pojedine vrste prijevoza ("Službene novine Federacije BiH", br. 51/06 i 79/06), u članu 3. stav 2. brojevi "(1+7)" zamjenjuju se brojevima "(1+1+7)".

Član 2.

U članu 11. stav 1. riječi: "javnog vanlinijskog" brišu se, riječ "osam" zamjenjuje se riječju "devet", a brojevi "(1+7)" zamjenjuju se brojevima "(1+1+7)".

Član 3.

U članu 16. stav 1. tačka 17) iza riječi "prometa" dodaju se riječi: " i drugi pribor za zaštitu vozila od oštećenja prilikom utovara, istovara i prijevoza".

Član 4.

U članu 17. iza stava 3. dodaje se novi stav 4. koji glasi:

"Rezultate mjerenja i ispitivanja vozila unosi stanica tehničkog pregleda putem računara u aplikativnom programu jedinstvenog informacionog sistema. Uneseni podaci čuvaju se deset godina u elektronskom obliku na serveru stručne institucije."

Dosadašnji stavovi 4. i 5. postaju st. 5. i 6.

Član 5.

Član 19. mijenja se i glasi:

"Potvrdu o ispravnosti i opremljenosti vozila za obavljanje prijevoza u cestovnom prometu (u daljnjem tekstu: Potvrda) izdaje ovlaštena stanica tehničkog pregleda, tek nakon što na osnovu neposrednog i cjelovitog uvida i ispitivanja vozila utvrdi da je vozilo tehnički ispravno i opremljeno u skladu sa odredbama Zakona o osnovama sigurnosti saobraćaja na putevima BiH i Zakona o cestovnom prijevozu Federacije BiH.

Potvrda sadrži jedinstveni serijski broj i sačinjava se u dva primjerka, koji se uručuju korisniku vozila.

Jedan primjerak Potvrde izdaje se na obrascu formata A4, roza boje sa elementima zaštite i predaje nadležnom kantonalnom ministarstvu radi izdavanja rješenja o ispunjavanju tehničko-eksploatacionih uslova za vozila kojima se obavljaju pojedine vrste prijevoza.

Drugi primjerak Potvrde izdaje se na obrascu formata A4, bijele boje i služi kao dokaz u postupku registracije vozila.

Stručna institucija obezbjeđuje obrasce Potvrde sa elementima zaštite, distribuira ih stanicama, vodi evidencije i mjesečno izvještava Federalno ministarstvo prometa i komunikacija. Izvještaj treba da sadrži: naziv stanice tehničkog pregleda, ukupan broj zaduženih obrazaca, raspon (od broja do broja) serijskih brojeva zaduženih obrazaca i datum zaduženja.

Potvrdu potpisuje voditelj stanice, stavlja otisak pečata voditelja i stanice tehničkog pregleda.

Oblik i sadržaj Potvrde dat je u Prilogu 1 ovog Pravilnika i čini njegov sastavni dio. "

Član 6.

Iza člana 19. dodaju se novi članovi 19a. i 19b. koji glase:

"Član 19a.

Za vozila kupljena po osnovu ugovora o leasing-u, Potvrda se izdaje na ime korisnika vozila, a rješenje o ispunjavanju propisanih tehničko-eksploatacionih uslova za vozilo donosi nadležno kantonalno ministarstvo u kojem korisnik ima sjedište/prebivalište.

Član 19b.

O izvršenim pregledima za ispunjavanje tehničko-eksploatacionih uslova za vozilo prema ovom pravilniku, stanica tehničkog pregleda vodi registar, koji čuva u periodu od pet godina.

Registar se vodi u obliku knjige ili na računaru koji je uvezan u jedinstveni informacioni sistem.

Ako se registar vodi na računaru, zaposlena osoba na unosu podataka, na kraju radnog vremena treba odštampati unesene podatke za taj dan i ovjeriti svaki list.

Oblik i sadržaj registra dat je u Prilogu 2 ovog Pravilnika i čini njegov sastavni dio."

Član 7.

U članu 20. stav 1. alineja 3. broj "15" zamjenjuje se brojem "10", iza broja 10 dodaje se riječ "radnih".

Član 8.

U članu 22. stav 1. broj "18" zamjenjuje se sa brojem "17".

Iza stava 5. dodaje se novi stav 6. koji glasi:

"Za obavljeni komisijski pregled privredno društvo iz člana 17. stav 1. uplatiće jednokratnu naknadu na račun Budžeta Federacije BiH i kantona u kome se nalazi u skladu sa Rješenjem kojeg donosi federalni ministar prometa i komunikacija".

Raniji stav 6. postaje stav 7.

Član 9.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 06-02-1-185/09
9. februara 2009. godine
Sarajevo

Ministar
Nail Šećkanović, s. r.